

皇  
清  
奏  
議

皇清奏議卷二十六

敬陳江蘇四事疏 雍正二年

鄂爾泰

江南江蘇等處承宣布政使司布政使臣鄂爾泰謹 奏  
為敬陳管見事竊臣受事江蘇已經一載地方事宜粗悉  
大略如丹徒丹陽河面係杭嘉湖紹蘇松常七府之運道  
而沐夫批淺獨累兩邑之民糧漕關係甚鉅旗丁固宜優  
恤然馭之不善而驕悍橫索官府莫制遂為商民累州縣  
分修戰船營弁勒索州縣船不堅固官受賠墊徒為科斂  
口實凡此諸事業蒙 聖主洞鑒諭令查議臣更敬摭  
一得附陳四條伏冀 聖主採擇焉  
一漕船之宜更舊式也謹按糧艘舊式船身雖廣濶長大  
而每船所裝額米不過六百石此外悉供運丁水手廣載  
私貨以致船身過重過淺即阻滯受兌開行覓攬客貨包

載過關停泊接受勢需時日迨過關上進以及達通沿途發買客貨又須留滯船式過大遂得藉口實非無因敢於玩誤也況船大則行遲行遲則擁塞擁塞則河路益隘而民船不得通甚有相去數丈守候經旬兼之硬掣剝運極捷交加怨聲載道誠有如此

聖主明諭者以臣愚見與其大而無適於用莫若更其式而有便於漕並有便於民嗣後每遇一船破壞併屆滿號大造之期請即飭令更造如舩子船式窄小而長量其所裝可容千石六百石以裝正供一百石以裝行月口糧餘三百石地仍許其帶貨則船小載輕不難撐運即遇淺灘亦易扛幫而於旗丁輩仍無苦累商販民船且得肩行無礙殊兩便矣況船小則水手亦可減裁少一人即少生一事兼又便於舉棹其行亦速將不逾六月便可抵通不逾十月便可回次不惟易於

督運復有益於商民或亦救弊之一法也

一巡道之仍宜專設也竊查蘇松二府地當濱海民稠地沃賦重風刁且有泖澱太三湖汪洋千頃最易藏奸東南壤接浙江盜賊不時出沒所以向設分巡道一員駐劄蘇州府城巡查防範以專責成至於糧道督理蘇松常鎮四府漕白二糧始須設法催征繼則到次督趲而又押運赴淮按船盤驗是糧道一官亦難離以他事分擾其心惟是康熙二十二年間將巡道一缺裁併糧道而巡查之責與催趲之任遂統歸一員竊思糧道之催趲正當冬月而匪類之竊發亦係寒冬若押運赴淮勢不能不顧此而失彼以臣愚見似應查照舊例設分巡道一員巡查地方以資彈壓以專責成

一水利之亟宜宣通也按高貢三江既入震澤底定震澤

者太湖也太湖之水分洩於三江以入海三江者東江吳淞婁江也婁江即今之劉河在蘇州府城之東經崑山縣抵太倉州境環城南而東過嘉定縣以入於海上洩諸水下通潮汐東南半壁實賴之故其通塞所關甚重河向寬二十餘丈後因於天妃宮建閘束其水勢潮汐來緩以致停淤暴塞所存河面僅五六丈土人方欲去之而於康熙五十四五年間又建六渡橋之新閘而河道日湮因六渡橋去海已遠潮力已微束之以閘則潮來愈微退時愈緩緩則沙停漸成淤積以致濱河田畝灌漑無資此則旱之為患也若遇大水為災河道本細復有此閘梗其咽喉以震澤西來列郡之水盡趨劉河而爭出於丈餘之水門其洩瀉不及則汎濫漂溢之患必不能免此又水之為患也當時與六渡橋並建者又有七浦一閘此閘去海為近潮

大則阻於閘而不及進閘外之田受其汎濫潮小則阻於閘而無所入閘內之田無從戽救故二閘一建而三郡之水利欲絕士民無不欲去此二閘者而以當日建造之始經督撫請題未敢議廢殊不知地勢有更遷事機分利害因革興廢在乎審時況在議建之時本為利民計也而未見為民患及今已受其患若仍不為變通拘於前議恐水利反為水害並於前議利民之初心亦大相悖謬矣臣博訪羣議如出一口倘邀

聖明恩允廢此兩閘太倉等

三州縣萬民實攸賴焉

一委署之難拘成議也伏念知府一官有統率屬邑盤查倉庫之責州牧縣令有刑名錢穀城池庫獄之司職任匪輕違委宜慎在從前陋習凡府州縣缺出鑽謀署印者爭先恐後不肖大吏以此居奇視耗羨之多寡定賄賂之重

輕而被委之官原期藉此獲利既所費已多且為時不久遂至百計營私而侵拮盡民無所不至荷蒙 聖明洞

燭特頒定例署印之官凡有虧空即著落原委署之上司分賠法至善也近奉部覆臺臣王恕條議知府缺出止許委府佐署理州縣缺出止許委隣近之州縣兼攝其所以杜通融瞻徇之弊者至詳且悉臣又何敢置議獨是地方有小大之不同政術有繁簡之各別因地制宜庶免貽誤查蘇松常鎮所屬之二十州縣俱係財賦重地事務殷繁江寧之上江句溧諸邑揚屬之江都暨高郵二州淮屬之山陽宿遷等縣並皆衝劇要地素稱難治如收漕之時印官住宿倉廩殫力徵輸尚虞遲誤平時催徵各項錢糧條款繁多日昃不遑猶難如限加以 欽部命盜重案並承追承緝各案均有嚴限例于參處任斯職者即使才具

優長亦止能勉盡職守若委以他篆恐即有兼人之才亦  
乏分身之術勢必以本地之事私委衙官則害民誤事更  
有甚於同知通判者是隣近兼攝之事可行之於他省而  
未便概之以江蘇也臣查佐貳官首領等官未嘗無長才  
若概不許委署恐敏練之員無由自効非所以示鼓勵隣  
近州縣等官未必皆循吏若例定以兼攝恐夤緣之輩反  
得借徑非所以示防閑況既遵定例凡署印之官但有虧  
空即著落委署之上司分賠則委署之責自當聽任應分  
賠之上司若分賠則有嚴例委署實無專責或受分賠未  
免屈抑即見委署亦難遴選深計熟思恐終無補據臣愚  
見嗣後州縣缺出惟當欽遵 聖諭令該管上司不拘  
何官但慎擇才守兼優者詳請委署其委署之官一有虧  
空或至情誤即著落分賠仍加嚴處在該管上司既無可



推諉則為公為私倍加詳慎而通融瞻徇之弊或亦不敢  
出此矣至於知府缺出詳委府佐署理事可通行然遇府  
佐中或無可委之人亦當隨時變通以收實效以上四條  
均關民事臣自維職守不揣冒昧伏乞 聖主睿鑒

請均撥賑捐穀疏雍正二年

李紱

巡撫廣西等處地方提督軍務兼理糧餉都察院右副都  
御史臣李紱謹 奏為請均撥賑捐穀以濟實用事竊查  
廣西捐穀專積於桂林梧州柳州南寧四府聞開捐之初  
實由四府任事之官欲專其利非為備荒計也如果為備  
荒計自當九府分捐何獨積於四府且桂梧南柳之民不  
加多其餘五府之民亦不加少一有荒歉廣西地方遼闊  
動輒千里移粟移民猝難呼應此所謂有名而無實也至  
於原收捐價每石一兩一錢發給州縣存貯每石止給三

錢或給二錢四分不敷採買則官賠累短償發賣則民賠累尤非四府官民力所能支臣請將四府捐穀分貯九府仍照地方大小酌量多寡庶官民賠累以分任而稍輕又臣前覆奏墾荒事宜請將捐穀借給牛種九府各有荒地則九府各有墾荒之人勢不能俱就四府借給牛種如九府並貯有捐穀可以隨地借給又近日奉 旨設立社倉督臣孔毓珣請將常平倉穀借民取息為本意亦甚善但常平倉穀止四十餘萬而糶借兼用捐穀一百一十餘萬而糶借兩無所用似未為調劑之平若各府均貯有捐穀則以捐穀借民取息為社倉之本而常平倉穀可專存為平糶之用矣蓋一轉移間而捐穀不憂朽蠹不累官民各府墾荒有資社倉有本較之偏積四府似為妥便可以久行伏乞 皇上睿鑒

敬籌晉省積貯疏 雍正三年

劉於義

右春坊右庶子提督山西學政臣劉於義謹 奏為密陳  
管見以備 採擇事臣自雍正元年十一月十七日到

任後伏見山右兩年以來田穀豐收百姓樂業皆由我

皇上留心民瘼感召

天和百穀順成民物康阜因

憶臣初到時歷考各郡每於道路遇有逃荒百姓多至百  
人少亦數十攜婦挈子背負車裝紛紛歸里臣細加訪問  
或云河南逃荒或云直隸起食今年歲已好故覆回家  
耕種如此之人不一而足至臣聞前平汾二府積荒之時  
賣兒鬻女夫婦相棄顛沛流離無所不至臣猶記 聖

祖仁皇帝一聞山右荒歉即發帑金數十萬

特遣廉

潔大臣多方賑濟其所存活不知已幾千百萬而尚有如  
此者由於素無積貯故也平汾為山右殷富之鄉百姓頗

有積蓄而猶不免失所蓋積蓄之富戶有限而無積蓄之貧民無窮以有限之富戶救無窮之貧民勢必不能至於常平倉社倉州縣既視為故套即有所積亦甚無幾不足備荒目今山右當豐亨之年正可行積貯之計臣以為宜豫為籌畫者此也臣伏見

皇上今歲以直隸地方稍有淹沒宵旰焦勞百方援救凡在臣民無不感激山右不通運道難於截留道路崎嶇艱於商販臣謂宜乘此時或動正項錢糧或從公費養廉中節省每年將銀四萬兩為百姓積貯太原為省會之地每年應將銀一萬兩建倉積貯以備太原汾州沂州代州保德州平定州等處需用南路平陽府每年應將銀一萬兩建倉積貯以備平陽蒲州解州絳州吉州隰州等處需用西南路潞安府每年應將銀一萬兩建倉積貯以備潞安澤州沁州遼州等處

需用北路大同府每年應行銀一萬兩建倉積貯以備大同朔平宣武等處需用每府擇州縣或府佐貳官廉潔有才者專董其事果能三年出納盡善實心辦事不致絲毫虧空者准其議敘陞用其有挪移侵蝕虧空等弊嚴加處分夫每處銀一萬兩若過年歲豐收可糴小米一萬三四千石青黃不接時出糴秋收時買滿推陳易新貴糴賤糴又可得米二三千石若積至五年一處便可得貯米七八萬石四處計之便可得貯米三十一二萬石夫有豐有歉天道之常宜有積貯至三十一二萬石之米而猶不足備一省之荒者乎行至五年便可不用採買蓋積貯愈久米穀愈多其間小歉平糶中歉出借大歉賑濟務定章程以垂永久夫以五年積貯雖費二十萬金而合山右數百萬之生靈永享無窮之利臣習見 皇上誠求民隱睿慮

周詳凡閭閻至纖悉之事無不區畫盡善臣以芻蕘之言  
豈能有助萬一而不敢不陳者仰見 皇上憂勞直隸  
之心故欲為山右計久遠也前臣在江南時見百姓有積  
米數十石責糶賤糶不十數年已成殷富者家國天下本  
一利也總之即一省中米價貴賤各州縣亦自不等調劑  
運用儘可區處米價不但不可使太貴而亦不可使太賤  
是在大吏實心經畫耳

敬陳豫工情形疏 雍正三年

稽曾筠

副總河兵部左侍郎臣稽曾筠謹 奏為謹陳豫工情形  
仰祈 睿鑒事竊照豫省堤工年久廢弛蒙我 皇  
上軫念運道民生不惜帑金大加修治一切明險之工俱  
已加幫高寬足資捍禦惟外有民堤月堤之處當時原估  
之員從慎重錢糧起見既有重門可恃暫緩加幫俱未入

估即間估修者亦不過每丈加土兩三方略補殘缺但民堤築自民間卑矮虛鬆非若大堤之高寬堅實而月堤亦多年不修單薄頽圯均難足恃查豫省堤工每因民堤成患如本年儀封縣之大寨蘭陽縣之板廠皆民堤先潰致漫大堤即前年中弁縣之楊橋十里店亦俱因民堤漫開可見暗險之工因有恃而失所恃前車可鑒急應為綢繆未雨之計也又查加幫大堤原估之時工程綿遠俱未測量地勢之高下而概行估計是以每有間段高低未能一律今秋水漲其地本高者堤亦高水不能漫至低處水平堤頂危險非常隨於堤上加築小堰暫為抵禦亦非長久之道此皆實在情形臣往來巡視目擊心儆者也臣仰體皇上慎重河防至意不敢苟安目前革率從事謹委諳練河員逐細算估臣再行覆勘明確與河撫二臣會核

題請興修以期永遠無虞上慰

聖懷伏乞

呈

上睿鑒

謹籌徵輸積欠錢糧疏

雍正三年

張楷

巡撫江蘇等處地方提督軍務兼理糧餉都察院右副都御史臣張楷謹奏為請籌徵輸積欠錢糧以裕國賦事竊臣查核通省錢糧冊卷自康熙五十一年至雍正元年內止蕭縣贛榆無欠泰州碭山儀徵江浦四州縣欠止數百兩嘉定長洲等四十州縣尚有未完地丁漕項等銀共積欠至八百八十一萬臣又查核各州縣錢糧完欠分數自康熙五十六年至雍正元年每年未完至五分以上及二分以上不等是從前新糧尚不能全完帶徵竟致有名無實見今新舊錢糧歸併一歲並徵臣查江省每年額賦除蠲免浮糧外應實徵銀三百五十三萬兩再加歷年舊



欠計共一千二百三十四萬兩竭一民一歲所收籽粒斷難責以全完且逐年欠款既多不免差催絡繹花戶更多一番費用併致新糧不能全完臣再四思維若不急籌一徵輸之法何以剔除鉅弊隨同布政使鄂爾泰酌議除江屬本年新糧務期責令全完外至各屬未完地丁漕項等舊欠銀兩仰懇 皇上勻作十分請自雍正四起每年限其徵完一分不必又分年款逐限咨參勻作十年按照分數徵完於每歲奏銷時另冊 奏報如不按欠追清承追官議以降職二級仍令同次年應完銀兩帶罪併徵全完准予開復如仍不完即以降二級調用如能徵過舊欠一分以上者所餘銀兩准留作下年完數仍格外予以紀錄一次以示鼓勵抑臣更有請者嘉定一縣積欠未完地丁漕項等銀共有一百四十餘萬兩若令十年帶徵連本

年銀米則每年應共徵銀三十九萬兩零勢又不能全完  
應請勻作十五年分徵其次上海崑山常熟華亭宜興吳  
江武進婁縣長洲等九縣核計未完地丁漕項等銀共皆  
積欠至四十萬兩至六十餘萬兩不等應請勻作十二年  
分徵其承追各官並請同前一例處分此又出自 皇  
上格外之仁錢糧事關重大臣不敢冒昧具 題謹先備  
細繕摺奏請 聖裁

皇清奏議卷二十六

皇清奏議卷二十七

請開臺灣過米之禁疏

雍正四年

高其倬

總督浙閩等處地方軍務兼理糧餉都察院右副都御史  
臣高其倬謹 奏為請開臺灣過米之禁接濟泉漳民食  
事竊查閩省泉漳二府向資臺米以濟民食自朱一貴變  
後巡臺御史恐其運出接濟洋盜又恐聽民搬運以至臺  
灣米價騰貴或生事端遂禁止不許過海泉漳之民有米  
無米在所不顧不知臺灣地廣民稀所出之米一年豐收  
足供四五年之用民人用力耕田固為自身食用亦囤賣  
出贖錢一行禁止則囤積之米廢為無用既不便於臺灣  
又不便於泉漳究竟泉漳之民勢不得不買臺灣之民亦  
勢不能不賣查禁雖嚴不過徒生官役索賄私放之弊臣  
以為過米之禁宜酌籌變通查開通臺米其益有四一泉

漳二府之民有所資藉不苦乏食二臺灣之民既不苦米積無用又得賣售之益則開田愈力三可免泉漳臺灣之民因米糧出入之故受捐勒索之累四泉漳之民既有食米自不搬賣福州之米福民亦稍免乏少之虞臣謹將應行開禁情節繕摺請

旨至開通米禁有須防之處二端亦不可不加詳慮其一恐泉漳之民任意搬買或致臺灣米貴查臺地一年豐收足供四五年之食嗣後應於冬成之時詳加確查若臺灣豐熟即開米禁倘年成歉薄即禁止販買雖年歲稍豐而一時偶有米貴情形臣亦即隨時查禁必不敢疎忽滋事其一恐買米之船接濟洋盜查海洋之中刦米為盜者頗多買米為盜者實少閩地歷來諸臣既於此總總過計臣亦不敢不於此詳細周防嗣後泉漳之民過臺買米者俱令於本地方報明欲往臺買

米若干載往某處販賣取具聯保詳報臣等衙門即飛行臺灣及所賣之府縣兩處稽查如有不到即係偷賣必嚴懲聯保究出本船之人盡法重處如此查防自不致接濟洋盜矣

請籌閩省平糶之法疏 雍正四年 高其倬

總督浙閩等處地方軍務兼理糧餉都察院右副都御史臣高其倬謹 奏竊臣細看福建情形福泉漳汀四府產米不敷民食泉漳更甚每年至二月三月平糶不能不行米穀一節最為福省第一緊要之事而歷年以來平糶之中積有二大病以致官廩日虛刁風日熾此二病不除難言充實倉儲接濟民食其一則從前各官交盤存價收受而所作之價又係不敷買補之價雖有不肯收受之員加以上司之抑捺衆口之調停即不得不收是以日見空虛

竟無彌補臣見在徹底清盤務必懲革此弊容臣查清另行具奏其一則年年平糶之價太賤即舉福州一府而言歷年即極豐之歲最賤之價米未有買至一兩一石者向時督撫但計目前百姓之稱揚不顧將來買補之無法平糶之米每石價減至一兩且有不及一兩止賣九錢者此雖米石極賤之時所不能有之價下屬奉批收存此價欲買之本處則本處無一兩及九錢一石之米可買欲買之外省外省雖有一兩及九錢一石之米可買其各項運腳從何而出是以屬官之中亦有尚欲籌補者緣價短難買惟付之束手無策聽其空虛待受參處耳而中間因糶價太賤更生一大弊端奸民豪棍乘此謀利得米到手輾轉之間即有餘利而窮民亦相附和雖設法愈密而其術愈巧竟視平糶為其一次大生意往往借米價略貴即鼓煽

窮民恐嚇官府壓之以官應愛民之說迫之以人情洵洵之勢相沿既久其意竟欲平糶之期一歲早似一歲平糶之價一年賤似一年所以從前有糶價太賤且在年內即行平糶者不知此不過米價稍貴非饑荒可比米價稍貴乃遂如此若實遇荒年將何以處臣細看未安併此糶價太賤一節若不極力挽回則福省之倉儲惟日空虛民食終不能接濟臣之愚見如福州府來年平糶視米之程分高下每石定以一兩二錢或一兩三錢穀亦視其程分高下每石定以六錢五分或六錢其各倉之穀亦有在倉年久及當日收倉之時程分即低者再隨宜酌定至於各外府州縣亦隨其地平時米之貴賤定價總之必計算本地秋成後既平之價為準務使既糶之後仍可於本處或外省買運運倉乃可源源接濟不至一發不繼但愚民止願

目前不計久遠止知目前得賤價之米之好不知將來無接濟之米之苦必以為臣不如從前督撫之愛民加以因俗浮薄刁棍復多而紳衿之多事者又從而和之恐有扞格騰謗之事但臣為地方長久之計初行之時若少畏難流弊何所底止然臣亦不敢孟浪從事已詳細熟計豫期先行多方曉諭使各紳士軍民皆知臣之此意是為百姓計慮久遠即使價稍有餘總仍添買穀米以濟閭民並無一毫自為之私而以堅定持之自然信從可行其平糶之時雖不必太早然亦不能太遲臣酌量緩急次第辦理再行具奏所有情節臣謹據實奏聞再閩省情勢倉儲豐歉民間纖悉皆知米穀多餘則人情安定辦理晚諭一切易行所有江南之穀久蒙聖恩諭運江南自上緊易穀運送但早則更為有益伏乞聖恩再令江南早



趁北風多時發運不必拘定二十萬石隨得隨發則趁風  
速到若少遲南風一多恐難行走不能刻期至聞臣謹一  
併奏懇 聖恩仰祈 睿鑒

敬陳東川事宜疏 雍正四年

鄂爾泰

巡撫雲南等處地方提督軍務兼理糧餉管雲貴總督事  
臣鄂爾泰謹 奏為敬陳東川事宜事竊查四川東川一  
府原係土酋祿氏世守地方考祿氏籍隸馬龍分據東川  
明季未歸版圖至康熙三十一年始獻土改流議歸四川  
管轄其地與雲南省尋甸祿勸霑益三州接壤距雲南省  
城四百餘里方隅廣闊地土肥饒昔遭流寇之後半未開  
闢兼之土人兇悍專事剽掠川民不肯赴遠方耕種滇民  
亦不敢就近播壅故自改土以來三十餘載風俗仍舊貢  
賦不增該府每年徵折等銀止三百餘兩俸工兵餉不敷

悉赴成都支領往返維艱以天地自然之利致為荒蕪不治之區良屬可惜況東川去成都二千八百餘里一切事宜俱有鞭長不及之勢即如上年十月內烏蒙土府祿萬鍾之叔祿鼎坤統衆攻打東川村寨知府周彬慮川省遠不可恃具報滇省經前督臣高其倬撥兵應援始獲解散解散之後而川省所發令箭方得到府是川省之無濟於東川而東川之無益於川省也明矣況尋甸祿勸霑益三州之民時遭東川土人之害鄉墟人口剝搶牲畜不一而足及至赴官理備文關提川省官例問土目火頭而土目火頭惟就中攫利曲為隱庇經年累月竟不挈解一犯洵為滇省之累臣接稽誌圖博訪輿論若得東川府改隸雲南聲教易及凡滇黔兩省商民有力能開墾者廣為招徠以實其地並將附近營汛斟酌移駐以資彈壓不但兵民

衆多土人自不敢橫肆且從前茂草皆變為膏腴民受福  
利國增錢糧似亦因地制宜及時變通之一端也再查烏  
蒙土府與東川接壤驕悍兇頑素稱難治不惟東川被其  
殺擄凡黔滇蜀接壤之處莫不受其荼毒而產富田肥負  
固已久若不早圖終為後患如蒙 聖恩允東川歸滇

俾臣指令將備先懷以德繼畏以威然後徐議改流不二  
三年間或可一舉大定至於防守官兵亦無庸另設查督  
標援勦左右二協原備調遣並非扼要應止留一協去左  
右字改為援勦將一協裁省移駐東川府改為東川協其  
東川原駐官兵是否應裁均聽部議是一轉移間地無棄  
土兵無冗食節餉便民而地方賴以寧輯矣

分別流土考成疏 雍正四年

鄂爾泰

巡撫雲南等處地方提督軍務兼理糧餉管雲貴總督事

臣鄂爾泰謹 奏為分別流土考成以專職守以靖邊方  
事竊照流土之分原以地屬邊徼入版圖未久蠻烟瘴霧  
窮嶺絕壑之區人跡罕到官斯地者其於探俗苗情實難  
調習故令土官為之鈐制以流官為之彈壓開端創始勢  
不得不然今自有明以來已數百年中外一體流土同官  
既有職銜寧無考察乃仍以夷待夷遂致以盜治盜徒令  
挾土司之勢以殘虐羣苗隨復逞羣苗之兇以荼毒百姓  
橫徵苛斂貢之 朝廷者百不一二而燒殺刦擄擾我  
生民者十常八九必須控制有方約束有法使燒殺刦擄  
之技無能施為而後軍民相得以安茲准部咨伏讀

聖諭以流官有設立吏目者職分卑微無印信可行無書  
役可遣土司意中倘有輕忽之念則未必肯遵其約束今  
可否酌土司之大小將微員如何改設重其職守使流土

相適地方各安該督撫會同密議具奏欽此大哉 王  
言所以為邊方計者誠無微不至無違弗照矣除俟會同  
督撫諸臣將兩省各府州通盤合計妥議覆奏外臣竊念  
流官固宜重其職守土司尤宜嚴其考成土司之考成不  
嚴則命盜之案件積大凡殺人劫財皆係苗獮雖一經報  
聞隨即緝捕而潛匿寨中已莫可窺探故無論吏目等微  
員任呼不應即使府州閭移梟使牌票亦置若罔聞十無  
一解非知情故縱即受賄隱藏其在流官束手無策大吏  
深難其事不敢咨題多從外結其實得外結者亦復無幾  
故刦殺愈多盜賊益盛擄人男女掠人財物苗子無追賊  
抵命之憂土官無降級革職之罪有利無害何樂不為此  
土司之考成不可不嚴所當與文武流官畫一定例者也  
據臣愚見事各有專責應分為三途盜由苗寨專責土司

盜起內地責在文員盜自外來責在武職責在土司者未減流官責在文員者未減武職責在武職者亦未減文員參罰雖俱不免輕重各有攸分盜由苗寨者是平時不行鈴束而臨時又不行防閑此土司之罪也盜起內地者是鄉保不行稽查而捕快又不能緝獲此文員之罪也盜自外來者是塘汛不能盤詰而兵丁又不能救援此武職之罪也以此三者分別議罪土司無辭流官亦服然所以清盜之源者莫善於保甲之法臣屢與督臣楊名時撫臣何世璽熟商酌議擬立規條行之兩省及開邸抄知荷蒙

聖恩著九卿詳議具奏臣等伏候奉

旨部行到日

當即頒行一體遵奉外按保甲之法舊以十戶為率雲貴土苗雜處戶多畸零保甲之不行多主此議不知除生苗外無論民夷凡自三戶起皆可編為一甲其不及三戶者

令遷附近地方毋許獨住則逐村清理逐戶稽查責在鄉保甲長一遇有事罰先及之一家被盜一村干連鄉保甲長不能覺察左鄰右舍不能救護各皆酌議無所逃罪此法一行則盜賊來時合村百姓鳴鑼吶喊互相守望互相救護即有兇狠之盜不可敵當而看其來踪尾其去路盡力跟尋訪緝應亦無所逃至於保甲之外最重者莫如嚴責捕快與汛兵蓋內地之盜捕快多有知情外來之盜塘兵且為通氣平時緝盜之捕快皆宜分定鄉村某方失盜罪在某捕快而捕快之中亦有奸良不一能否不齊又須每十人立一快頭如緝盜不獲者捕快與快頭一同治罪大抵盜情未有能欺捕快者其塘兵之設原以晝則盤詰夜則巡防伊等平日毫無所事每晝則看牌賭錢夜則飲酒酣睡甚或乘空偷竊出人不意種種匪為又或夥眾結

強唆使剽掠陽防陰助其惡不可勝言必須嚴加號令定為成法使不得不留心盡力盤詰稽查則盜賊既弭而兵丁亦皆可用矣

豫籌買米以備平糶疏 雍正五年

高其倬

總督浙閩等處地方軍務兼理糧餉都察院右副都御史  
臣高其倬謹 奏為豫籌買米以備平糶事竊查福建福興泉漳汀五府及廈門金門海壇銅山南澳各處兵民稠密食米頗多至青黃不接之時米價頓昂每須米石平糶以資民食以平市價今年仰荷 皇上截留江南漕米十萬石浙江漕米易穀二十萬石又浙省透運穀五千七百五十八石零又撥江西米見已運到者二萬四千七百石零又葛繼孔運到米四千五百四十八石源源接濟分撥平糶是以米價平減民情安帖茲當夏末平糶甫竣各



處報數未齊約計米糶十之七八穀糶十之一二容臣確核石數糶價另行題報外臣思閩省來歲平糶應於今歲豫籌查通省見經盤查實貯穀共七十五萬九千餘石又加以今年運來浙穀以之料理來年平糶足數有餘但閩地之穀糶出則易買運稍難非帶潮潤年久難貯之穀不敢輕言發糶既不輕糶倉穀應思籌濟之法臣查江南漕米一項約糶價銀有七八萬兩臣愚昧之見請於八月間收齊此銀即在本省上游量買米石運省再委員赴外省年豐米足之處買運米石於冬底春初到江南海口趁北風運至閩省正值三月將糶之時與今年所餘江南截漕米石一併分糶倘少有不敷再酌以倉穀中之確應出陳易新者略行配糶即可接濟一則可減省平糶之倉穀再則舳舻相望民間米價不抑自平其糶出如有盈餘即行

造冊題報於來歲添買米石或充兵餉年年照此料理買得一分之米即省一分之穀且可平市價之頓昂似有裨益臣請自任辦理凡有虧空欺匿惟臣自問再遣員購運俱須及時臣謹一面量行先撥動銀三四萬兩分頭辦買除臣另行會題外謹將情節繕摺奏聞

請停粵東改築圍基疏

雍正五年

阿克敦

署理兩廣總督印務兵部左侍郎臣阿克敦謹奏竊臣准撫臣楊文乾移送會稿二件一為廣貯倉穀等事臣接閱卽抄見據九卿議覆無容臣等另為置議一為水利纂重等事內開請將高要等五縣圍基頂衝改築石工次衝改用椿埽約計數十萬金暫借庫銀修築作何補項另疏具題等因緣臣所見不同是以未經畫題卽將原稿移回所有臣不會題緣由敬為我皇上陳之臣查廣東之

西江自廣西梧州府滙左右兩江之水流入肇慶府界至  
廣州府三水縣北合南雄韶州連山諸水一由厓門入海  
一由虎門入海其沿江之高要高明四會三水南海五縣  
向有圍基俱係土工開竇建閘以時蓄洩每年於十一月  
後地方官督率鄉民按畝分工加卑培薄民不為苦官無  
所費相安已久至田畝間被淹漫圍基冲決多因江水湧  
漲圍基以內水難外洩所致去歲秋雨連綿水勢甚大惟  
三水一邑略有被淹之處三水以上肇慶府屬圍基並無  
衝決蓋江水雖急而性不剛猛非必石工格壅方能抵禦  
今若改築則費國帑不止數十萬且從前工程斷無一勞  
永遠之理工完之後勢必逐年修補耗費無窮以臣愚見  
不如仍循舊法著令地方官每歲於農隙之時督率鄉民  
分工修補倘遇江水驟漲不時遣員巡查以防衝決如果

實心任事圖基即能保固無虞似可無庸更議是否有當  
伏乞 皇上睿鑒

敬陳粵東開墾事宜疏 雍正五年 阿克敦

署理兩廣總督印務兵部左侍郎臣阿克敦謹 奏為敬  
陳開墾事宜事伏念 盛世戶口滋蕃惟墾荒可以足食  
欽奉 上諭令督撫悉心勸導實力遵行但粵東勸墾  
之條屢頒報墾之數無幾民多觀望不前者其故有四一  
由豪強之占奪一由胥吏之需索一由資本之不敷一由  
土瘠而畏日後之陞科以上四條百姓之觀望不前者在此  
而所以勸導之方亦在此勸導之方有五一定疆界以  
絕爭端一禁需索以寬民力一借籽種以助農工一輕陞  
科以示優恤一廣招徠以盡地利如此則民無觀望不前  
之心而報墾者自必接踵而至抑臣更有請者勸懲之法

不可不講也其要有二一荒田既墾其利在民陞科之後  
倘遇歉收或避稅他往其責成則又在官故官之勸墾不  
力者職由此耳今宜明示勸懲如州縣官能勸墾十頃以  
上者紀錄一次多者計算加級見任官能捐籽種牛具墾  
荒至三頃已上者紀錄一次多者計算加級倘勸墾不力  
廢厥職守即據實參處則官知懲勸矣一凡富厚有力之  
家率先遵奉以開墾之多寡分別獎勵如墾至一頃以上  
該地方官給賞花紅二頃以上給賞匾額五頃以上照終  
身力田老農例題請給予八九品頂帶榮身則民知自奮  
矣臣查粵省在在俱有可耕之土而惟惠高雷廉四府荒  
地更多隨據各知府詳議與臣所見無異謹繕摺具奏

皇清奏議卷二十八

恭陳修築堤岸情形疏 雍正六年 邁 柱

總督湖廣等處地方軍務兼理糧餉都察院右副都御史  
臣邁柱謹 奏為恭陳修築堤岸情形仰祈 睿鑒事

竊照楚省連年水發沿江近湖之低窪田地致罹淹沒蒙  
我 皇上聖心惻惻恐有堤岸未修或有疏濬未力

特命 臣於到任後會同撫臣悉心商酌將如何興修防  
護之處詳悉議奏欽此 今 臣到任凜遵 諭旨星即檄

行布政使分委道府將各屬堤壩應如何加高加厚之處  
併水道湮塞應行疏濬者逐一勘報去後候該司詳到會  
題外 臣等復加體察連年楚省沿江兩岸堤壩每受水患  
者率由於歷年修築不堅所致查民間每年歲修估派夫  
土動至百十餘萬若果實夫實土盡用於堤工則逐年加

增何至日類月削祇因地方水利各官以修堤為利數將業戶所派夫土官役通同里催包折銀錢烹分肥己潦草完工是以年復一年不能堅固今蒙

諭旨令臣悉心

商酌敢不仰體

皇仁為一勞永逸之事然民修民堤

衆擎易舉若不用民力而動帑興修則工程浩大帑帑甚多況時已春令興此大工勢必趨修不及臣等愚見莫若仍聽民間照例修築臣等嚴禁諸弊責成道府力行稽察不容包折肥己務使實用工力以去年之水痕為準加高三尺非若從前之虛應故事且各屬里民感沐

皇上

格外蠲賑之恩見今業已踴躍赴工凡堤身之低薄者各加高厚水道之湮塞者自行疏通約在夏潦之前可以告竣惟沔陽監利江陵公安石首等州縣去夏清決之口甚多民力不足已經署督臣傅敏捐銀五千兩買米給發助

修外又江夏咸寧嘉魚蒲圻等縣應修長堤雖民夫見在與修但俱係上年被水地方工用繁鉅民力維艱臣等酌議幫助併有添修閘堰之處量為幫給以紓民力所需銀兩查有効力贖罪之鄭任鎬已繳司庫銀七千五百兩應將此項動支尚有不足請於司庫內先為墊用仍在鄭任鎬名下追完補項竊思今年修築之後如果保固夏潦則從此逐年歲修漸加高厚似可不煩動幫倘有必需大修之處容俟秋間另奏請 旨仰祈 睿鑒

彙奏沿海要務疏 雍正六年

李 衛

總督浙江等處地方軍務兼理糧餉管巡撫事臣李衛謹奏為彙奏沿海地方應行要務事竊臣身任重寄凡有關民生者隨時察訪次第舉行查寧波府鄞縣之大嵩十一十二十三都國民田數萬餘畝離海十餘里止嵩港一



條日久淤淺內少支河以蓄淡水外無堤塘以禦鹽潮雨  
少即憂旱乾潮大又防浸灌十載之中多半歉收上年偏  
災亦罹其患經臣飭委地方官查勘若於大嵩港口建築  
石壩使潮水不致內灌將嵩港淤河開濬深通自大碇頭  
至茶園止分浚支河於通海之橫山頭等處連石閘六座  
築土塘一條則蓄洩有資旱澇無患不但內地民田變荒  
瘠為膏腴而沿海十餘里塗田工竣之後初年可種植棉  
花二三年內盡可栽插禾稻一勞永逸實為萬世之利又  
鎮海縣之靈巖太邱二鄉俱係內地平坦之田方廣約數  
十餘里中間向有大閘為上半鄉救旱宣洩之計閘下有  
浦通流入海今已圯廢以致兩岸荒蕩萬餘畝棄置不耕  
即內地各田亦有水旱之虞若於浦口築塘內河修閘再  
相地形分建碇壩則兩鄉田畝咸得豐收荒蕩萬餘俱可

成熟此二處實皆大有益於地方緣工費各需鉅萬無有  
出處是以逡巡難行臣思此等有利於國計民生之事自  
當設法興舉今查有上年四川買回米石平糶價銀除歸  
還原款外尚餘銀一萬七十餘兩經臣咨部存庫留充公  
用又臣前以奏明鹽務內折編溢出銀二萬一千餘兩原  
留以抵修葺波府城等項公事之用今城工估計不及萬  
金費尚有餘相應請 旨於此二項內撥用一款成此

美舉工完核實題銷實於海疆有裨再定海縣初名舟山  
遷棄開復其中曠土開田甚多與新開之玉環山相等從  
前報墾各戶不無隱佔今雖陸續首出尚恐未盡亦應於  
秋收後委員協同地方官查丈清理至於沿海偷運私米  
臣久已嚴行禁止今逐細訪察尚有應須變通墮範者如  
台州之黃巖太平二縣素稱產米之鄉私運奸徒多於此

地購買前朝因黃巖地方廣闊故割其鄉都分設臨海太平二縣彼時地界犬牙相錯遂將黃巖縣東門十里之外由蛟龍港至家子棚浦海門一帶地方皆歸臨海管轄而實則自海門離黃巖陸路止四十里海道止六十里其離臨海則有一百二三十里不等目前私運奸徒多於此處出沒在黃巖雖近而非該管之地文武不無推諉即有挈獲亦必達解臨海往返需時在臨海雖屬管轄而鞭長莫及稽察難周臣見飭台州府協會同查勘確議擬將臨黃二縣所轄遠近不均之處酌量具題改定使界址聯絡責成得專不第偷運之弊可除而士民完糧聽訟亦無舍近就遠之艱再海門原係衛所從前駐劄總兵控扼海口後始移鎮黃巖此地與台協前所兩岸對峙中隔椒江寬廣十里自黃巖至台郡必由此江橫渡府城食米向仰給於

黃太二縣若禁其載米渡江則郡民有艱食之苦然由江入海片帆如飛以十里江面之寬又係急流捷徑瞭望稍有不及即被偷越出口今雖兩岸設立照票兼用營汛緝記挨號稽查而小艇扁舟紛紜難查終難盡絕因皆係陸汎並無水師營船常川巡察是以銅弊難除臣擬於此處兩岸皆添設水師船隻令其往來巡察庶為周密以上各條臣雖早為籌畫原欲俟八月間巡查海汎時親身再加察勘舉行今巡期未可豫必不便因循稽誤為此一面附摺奏明請 旨一面次第盡心辦理如有應行會同大理寺卿臣姓桂酌議者自當彼此會商畫一以期仰副皇上慎重邊疆之至意謹 奏

保守河工疏 雍正六年

齊蘇勒

總督江南等處河道提督軍務兼都察院右副都御史臣

齊蘇勒謹 奏為大工告成期保永固事竊照黃運兩河

仰蒙

皇上不惜數十萬帑金

特命通盤修理遍

將兩岸堤防一舉全成但此項大工縱橫綿亘數千餘里其保守之道尤不可不預為籌畫者也查從前堤頂之上愚民私蓋房屋櫛比而居竟有民舍坐臨險工之上者不惟搶護之候有礙捲埽之地不能拆毀每至周章而且久住房內或鼠穴叢生或人畜踐踏其中不無孔隙穿漏之虞更為可慮臣於上年遵 旨通盤修理卑矮各工俱以增高一丈有度而淮安府寶應縣之城門外其居民佔住之堤頂更屬卑窪若不急令拆房讓地取平加高是因堤上之草房數楹而故留一大缺口矣彼時臣按照房數給以重價令其星速拆讓隨即晝夜買土償築一律加高詎意工甫就而大水至所長之水較比舊日堤頂高出四

尺有餘此時遷移之衆方知從前居堤上者必無生理而  
臨湖居民見此利害漸有自行避險遷移者今沿河堤工  
凡係險要處所已經折讓加幫惟是遙月等堤與運河峰  
道道里綿長鄉民佔住日久一旦盡令遠遷恐致失所臣  
之愚見嗣後堤頂民房如有傾圮之時一概禁止重修令  
其移蓋於堤傍高隙之處逐漸遷移數年之內即可以除  
傷堤之患而河工搶護亦不至於礙手民社河防兩皆有  
裨矣再查佔住堤上房屋內有輸納房租者自徐邵以至  
江口每歲徵銀不過百有餘兩其有益於國課者甚少而  
為害於河防者甚大此項錢糧應請 聖恩豁免庶可  
以杜私佔之由而緊要官堤均得以永保鞏固矣

請除河工積弊疏 雍正七年

齊蘇勒

總督江南等處河道提督軍務兼都察院右副都御史臣

齊蘇勒謹 奏為請除河工積弊以固運道事竊照東省河道定例一年一小挑間年一大挑額設淺溜泉壩等夫不敷應用遂派民夫協濟續經山東撫臣佛倫題明酌令民間按畝出錢幫貼僱夫以均徭役既不妨農又不誤工歷來稱便乃奉行不善法久弊生地方官以少派多就中漁利管河官捏淺作深希圖分肥臣查大挑之年各州縣幫貼之銀約六萬餘兩小挑約四萬餘兩俱係地方官徵收僱夫給發工銀查此項幫貼銀錢年年全收全用從無餘剩亦無不足夫歷年水勢豈無大小之分河底泥沙豈無多寡之異而處處一樣挑浚年年一樣銷算毫無分別明係地方官與管河通同冒銷彼此分肥無惑乎運道之淺阻也自雍正元年荷蒙 皇上特頒諭旨寓賑濟于興役之中大加挑浚之後河道賴以深通糧艘通行無阻

但東省河道噴沙無定易致淤淺其每年挑浚之工必不可少此項幫貼銀兩自雍正三年奉 旨令臣稽查之

後臣於每年挑浚之時仍恐河官作弊俱令探量河底之深淺所積泥沙之多寡插標立記擇段興修淺者務要深通深者無庸挑浚至雍正五年共節省過幫貼銀二萬七千二百餘兩今雍正六年小挑按工估算又節省銀二萬七千七百餘兩又有存剩黃河廳屬雍正五六年分徭夫幫貼銀一萬一千四百餘兩以上通共節省過銀六萬一千三百餘兩今見貯庫以充正項錢糧之用臣恐此外又有別項瞞隱情弊復行一面密訪一面敬宣 上諭令

其自行出首去後今據運河同知及東昌上河下河張秋泇河各通判等首出每逢大挑小挑之年各州縣俱有餽送陋規銀兩又有每年餽送漕糧規儀河銀隨平等銀兩



伊等有已經收過者亦有自行裁革者又有新任未經收過者查此各河員所受之陋規俱係出於地方官之餽遺而地方官斷非出自己囊自必藉公費之名加派民間理宜速行禁革臣又訪得臨清州知州除正項淺夫銀兩外每於大挑之年派徵銀三千六百餘兩小挑之年派徵銀二千四百餘兩及查該州歷年造報冊內大挑止額收銀一千九百餘兩小挑止額收銀一千三百餘兩計算所剩之銀為數甚多明係該州多徵私用以此一州計之其餘額有幫貼之四十州縣其多銀兩更不知又有凡幾也似此指工漁利魚肉鄉民當嚴行禁革總之嗣後保守修防之道要在實力奉行方可以持永久一切事宜難容絲毫弊竇容臣查明之日一併具題請 旨永行禁革外所有管河官首出陋規地方官多派積弊緣由先行奏

聞伏祈

皇上睿鑒

酌通閩省四郡積穀疏

雍正七年

史貽直

署理福建總督印務吏部左侍郎臣史貽直謹 奏為敬  
陳酌通福興泉漳四府之積穀以免泛耗以實倉儲事臣  
自署理督篆以來無時不以倉儲民食為念因查福建全  
省地勢為東南最下之區內惟延建邵汀四府及福寧一  
州地處上游在省屬為略高之所若福興泉漳四府更居  
卑下每歲濕熱薰蒸倉穀易於霉壞從前原有存七糶三  
之例祇因福建濱海之地惟臺灣一府與延建邵汀四府  
福寧一州均係產米之鄉其福興二府產米不多泉漳二  
府產米更少是以福興泉漳四府及府屬各廳縣將倉穀  
糶出甚易買補最難而定例內凡前任官折價存庫者又  
不許新任官接受交代典守各員畏懼因循不敢輕言糶

易竊恐積貯年深倉穀必多紅朽若不及早設法圖維將來即將典守各員參處追賠完於倉儲無益臣謹詳細等畫得一變通之法查福興泉漳四府之倉及府屬廳縣各倉共額貯穀九十五萬五千五百餘石每年臺灣例應碾運米五萬石赴泉漳平糶又應碾運兵眷米一萬二千餘石又應碾運廈門提標金門鎮標兵米二萬一千餘石合計應運米八萬三千餘石若今臺灣停其碾米照一米二穀竟將穀十六萬六千餘石運至廈門令福興泉漳四府及府屬各廳縣按其積穀之多寡派令分運各倉即將府廳縣各倉內見貯舊穀照數碾米以為平糶及碾運兵眷廈門提標金門鎮標兵丁之需似此出陳易新陸續轉換旋易旋補舊穀既免積欠陳朽之虞倉儲亦無懸欠不補之弊輪至六年之內即可盡易新穀存倉嗣後歲歲遵照

更易誠為經久可行之計矣至於臺灣改米為穀運脚自當倍增福興泉漳四府及各廳縣由廈門運穀入倉不無運脚等費臣又從長籌畫查福興泉漳四府及所屬之穀雖照時價酌減平糶臺灣之米價賤而內地之米價昂除解運臺灣米價外此中尚有盈餘即以此盈餘之價為加添脚價之需足敷各項之用合併具奏伏乞 皇上睿鑒

請免軍田加稅疏 雍正七年

鄂爾泰

總督雲貴廣西三省等處地方軍務兼理糧餉兵部尚書兼都察院右副都御史臣鄂爾泰謹 奏為請免軍田加稅事竊查貴州軍田一項係前明屯衛軍丁管業糧賦差徭較民田獨重自 本朝裁汰衛所改設州縣後軍丁之名已經革除其向編屯糧仍照舊輸納因此田受之於官

例不買賣或有軍丁故絕遺產無歸或有子孫困窮私相典當此紛爭占奪評訟不休所由來也臣前於雍正四年到黔時前布政使申大成即有加徵稅銀之議臣以軍田名邑雖由官授然子孫相承已三百餘年原與己業無異且糧賦最重幾倍於民田若更每畝徵稅五錢恐不可必得反多擾累議遂中止迨申大成內調入款條陳部議准行臣恐已見未確不敢執謬隨經轉飭遵行在案臣因公來黔據軍民人等紛紛呈訴雖恐長刁風仍行批飭而留心訪察復面詢司道府縣各官知軍丁先代受田因明時隨征有功分給土地計軍一戶授田十八畝除上納屯糧歲丁外一切差役皆軍戶應承在當時已不免苦累故雖田本膏腴難以割棄而故軍子孫欲脫重賦轉售於人者已十分中之八九申大成謂故軍子孫坐享無償之田獨

不念該軍戶等累代累世之應差納糧猶不足抵十八畝之田價乎是所見之小矣至謂百姓頂買軍田利其價賤者按民間置產必核算籽粒除算錢糧然後合其利息照值論價此各省皆然查貴州軍田一畝自一斗五升起至三斗七升科則不等歲丁在外是便以一畝之價買得民田二畝之田而應納錢糧已以一畝可抵民田二畝之賦故雖軍田賦重而未便驟議輕減者實亦於輕重之中仍權量平準也今若每買田一畝再徵稅銀五錢合算每戶十八畝而應完銀九兩雖據稱有十餘萬之虛名料難完數千兩之實數究於民生無益更於國賦何補相應仰懇

聖慈將申大成條議新增稅銀一項准 賜豁免

凡土田授受悉照常例投稅印契從前私相典當者並令首明完稅補給契紙准其管業如有豪強侵奪及仍敢隱

奏二十八  
漏者嚴加懲罰庶訟端可除規條畫一而民無觀望軍無  
藉稱即清理田畝一案亦可漸次就緒矣

皇清奏議卷二十八

皇清奏議卷二十九

開鑿滇省河道疏 雍正八年

鄂爾泰

總督雲貴廣西三省等處地方軍務兼理糧餉兵部尚書  
兼都察院右副都御史臣鄂爾泰謹 奏為開鑿河道以  
利民生事竊照雲南尋甸州之宣甸二里宣化七里之歸  
龍寺果馬里十甲之潘所海子乞曲里之五里箐四處水  
利俱已完竣經臣奏明在案復查海子屯大河接連尋川  
河係匯嵩明尋甸兩州之水每夏雨水洊至漲漫洋溢加  
以馬龍一州之水會於七里橋下衝激尋河之水逆流泛  
濫滿於城南平川之內不惟可耕之區盡為水宅即沿山  
熟田亦被淹沒歷來無策捍禦臣細加博訪知尋川河之  
淹沒實由馬龍河之山高勢急冲激尋水倒行逆流不得  
暢瀉之故欲治尋河使不逆流莫若使馬龍河不爭水道



欲使馬龍河不爭水道莫若使尋河泛濫之水另開一河彼此不相冲激則順勢安流可以無阻查該處水龍村後名曰後海係泛濫之水蓄聚之區海前橫隔山梁鑿之使成子河則泛濫之水從後海東流入於尋河之下稍與馬龍河分道別流可以無憂漲溢復經詳諭該州知州崔乃鏞令於秋後覆勘作速興修毋得畏難避怨務期成功去後茲據崔乃鏞詳稱卑職遵諭即親往相度地勢自水龍村後開鑿河日起至橋頭村大河口入於下流止共丈量得七百四十餘丈中間堅硬頑石計有一百四十二丈高三丈二尺不等於雍正七年七月擇吉致祭十月初二日鳩衆興工卑職親身調度指畫督率盡力開挖至今年正月二十日業將河形挖開中間石梁鑿通計新開河口寬三丈二丈不等河底寬丈餘二丈不等儘可洩後海之水

歸於下流不復致泛溢請委員勘驗計垂永久再宣甸兩  
里見在耕種之田較之水淹荒田僅有十分之三今尋川  
兩岸涸出田地計可增二萬餘畝可否將涸出田畝以一  
半賞給出夫應役人等併各勸力士民暨設立水利頭人  
領種納種其一半令附近居民酌量納價領田永為己業  
統俟秋成後另行丈勘造冊申報臣已批准併行布政使  
會同糧道委員勘驗定議通詳在案謹按水利之興廢實  
關民生之休戚屬在滇南尤為要務臣不自揣欲將東西  
兩道凡有可興之水利逐處興修此二年以來勤訪密查  
不遺餘力除見在省城六河昆明海口併迤東諸府所屬  
一切河渠閘壩各項疏濬開築已有頭緒其餘迤西各屬  
已經查勘者有未經查報者務期確知以便妥辦在舉事  
之始雖不無所費然皆臣力所能嗣後則有涸出田地並

丈出田地應行變價銀兩見核數目已約有數萬即以此  
項辦此事總屬有餘斷無不足是以臣屢蒙 恩諭恐

力有不能今請動正項而並不敢請動正項亦不敢請動  
盈餘也獨是導水濟河務期一勞永逸暫行補救易長籌  
通利難就事治事易以人治人難臣愚擬俟各工報竣即  
備細彙敘具本題明請於道員廳員並佐雜官員內分別  
河道遠近酌量改銜兼銜今總理分理各屬水利再酌留  
歲修銀兩分定勤惰考成立季報月報之條著具詳具結  
之例其督撫藩司仍應將要緊河道分派考覈今不時勘  
修俾於總管之外又各有專責庶見在各屬員役不敢怠  
忽從前及後來大小官吏亦不致因循並無可議却或於  
邊方水利實有裨益矣

敬陳計典事宜疏

雍正八年

張廣泗

巡撫貴州等處地方提督軍務兼理糧餉都察院右副都御史臣張廣泗謹奏為敬陳管見事竊查直省督撫等衙門每過大計之期除卓異八法照例舉行外其不入舉劾之員俱密填考語送部臣列定等次進呈御覽即於部內存記檔案未奉行知是各該員之優劣其本人暨通屬皆不得與聞而各督撫所註考語既係密填密送無從彰露或仍有徇情任意之私亦未可定今雍正八年分恭值大計之期所有隸屬各官除應附薦官二員不謹罷軟年老有疾才力不及等官十八員照例具本題達外其不入舉劾之員臣俱逐細密填考語送部應俟部臣列定等次進呈御覽之後即請旨將所定等次飭部開列行知以便與原註各該員考語一件印刷粘單通知各屬俾其彼此優劣相形尤易觀感興起且其中才具

操守互有短長使知一經考核悉達 天聽則才具政  
事雖優而操守平常者必知儆惕加勉或操守雖好而才  
具政事中平者亦必力圖振作並請 敕諭督撫等將  
此屆所定等次俟至下屆考核之期詳慎稽覈如有自恃  
優等怠惰前修者不妨降為劣等如有悛改舊習奮勵上  
進者不妨陞為優等逐一據實填明出具考語送部以聽  
部臣考查不得瞻徇失實如此課職程能似可推廣  
聖主策勵臣工核實吏治之道於萬一也

條陳兵部事宜疏 雍正九年

孫柱

經筵講官文淵閣大學士兼理兵部尚書印務加四級臣  
孫柱等謹 奏為敬陳管見事臣部一應事件動關機要  
若或推諉因循不為嚴加懲戒恐相沿成習漸至弛緩臣  
等敢為 皇上陳之

一各司案件例有專責胥吏以上皆有當盡之職乃有一種漏習或因案涉繁劇或因事稍勞苦遂巧為推卸諉之他司甚至推之別部往返遷延每至遲誤不思奉公盡職人臣定分乃敢有意推諉故為巧詐挾私誤公實干法紀除臣等嚴加戒飭外倘有漫不悛改仍蹈故轍者經臣等查出定行嚴參律以重法此等人員內即偶有微長可取然其存心若此適足誤公一經查明斷難寬貸

一凡外省暨各部咨行事件例皆按日登記然輕重緩急難以一律若不分別辦理轉至遲誤除尋常事件仍按日料理外其稍關緊要者臣等親加詳查分別先後勒限催辦乃有故意推延或稱無例可查或稱舊業未得展轉推諉以至遲滯者不思

朝廷用人惟材原責以隨宜辦理若止據成例舊案只一書吏可查何須司員何須堂官

臣等請嚴為條約務令各竭其才力若果事涉疑難該司不能料理者令其呈堂臣等親自酌定倘有舛錯臣等自當身任其責若毫不盡竭心力籠統推諉以致遲誤臣等即行參奏照溺職例議處其別有徇私納賄等情者另行嚴參交送刑部按例定擬

一議敘之條上關國典奉命之日即應辦理乃至延遲經歲展轉支吾如一案議敘人員多至百十人其中止有一二人註冊未明遂行駁查甚且因一二字重複錯誤藉端駁詰延遲日久弊竇百出臣等嗣後請將議敘案件隨到隨辦即其中有一二人情事未明自當駁查不得因一二人以致稽遲大典至於一二字之重複錯誤詳查原案自可分晰而不肖官吏往往藉此以便需索除臣等見行嚴禁改正外若仍有此等弊端臣等查明嚴參將

該管官吏交部按律治罪

一軍功議敘尤關 大典介冑之士効命疆場非尋常勞績可比乃查以前敘功業內有力戰一次予一功牌力戰數次亦止予一功牌臣等詰問該司稱係定例如此竊思軍陣之際功罪尤嚴若立功一次予一功牌立功數次亦止予一功牌是一經立功之人轉不得再與議敘之例甚非 國家勸功行賞之意雖係成例亦當更定況查例內所載一處立功只於一處議敘者蓋緣一處報捷該管將軍提督總兵官各造冊申報其所報雖各不同而其戰功原只一處是以例不得重敘非謂今日立功既經議敘明日立功便再不與議敘也臣等請查明前案盡予改正彙總奏 聞其不行詳查遽稱定例之該管各員臣等查明交部分別議處



一武職議處事非一例而於盜案疎防一項往往反覆駁詰如初參疎防之案則駁以或係疎防或別有隱匿及至該處查明以實無隱匿呈報則又稱確盜窩主未經刑部審定應候結案後再議臣等查刑部盜案有遲至數年未結者若必俟結案後始為定議則應開復人員其中雖有可用之才該上司以參案未結例不得陞補而其應行議處者轉得將降級罰俸之處遷延歲月徒滋弊端於法無裨臣等請將疎防案件俱照該督撫提督所報即為定議仍將本業咨明刑部如審結後果有隱匿控報情由將該員仍照例議處其查報不實之各上司一並查明參奏如此則事案隨到隨結既不至於壅滯而於律法亦無疎縱

一胥吏之設只令收送文簿以便查對此外原別無執掌

乃猾吏舞文種種作弊或將新到文卷故意延捱舊存案牘擅自隱匿在堂司官以為稍遲一二日偶遺一二件未必遽有大弊然推陞之案稍差一二日其得缺先後各異承審之案稍遺一二件其情罪輕重迥別小人玩法罪實難寬臣等請嚴為條禁新到文書遲誤一二日舊存案卷遺漏一二件者臣等量行懲戒其遲誤至五日以上遺漏至五件以上者臣等查明分別輕重俱以杖責完結若別有行私索詐刪改塗註暨將緊要事件違誤限期者臣等奏明拏交刑部嚴審照招搖撞騙重律定擬以上各款臣等因衙門公事起見是否有當伏候  
皇上睿鑒施行

報修滇省水利疏 雍正九年

鄂爾泰

少保兵部尚書兼都察院右副都御史總督雲南貴州廣

西三省等處地方軍務兼理糧餉世襲三等阿思哈尼哈  
番加十二級紀錄二次臣鄂爾泰謹奏為報明修浚海  
口大修陸河等事竊以籌水利莫急於滇而籌滇水利莫  
急於滇池土人名之為海周圍三百餘里環海之田資以  
灌溉號為膏腴者無慮數百萬頃每五六月雨水暴漲海  
不能容所恃以宣洩者惟海口一河而兩岸羣山諸箐沙  
石齊下冲入河中填塞壅淤宣洩不及則沿海田禾半遭  
淹沒歲修歲壅殊非長策臣妻令糧儲水利道黃士傑親  
往查勘今將海口河道溯源窮流逐一修浚務期利興害  
除毋為苟且補苴之計據黃士傑回報勘得海口一河南  
北兩面皆山俱有箐水入河每雨水暴漲沙石冲積而受  
水處河身平行易於壅淤行至平定哨一閘水陡流急相  
度形勢諮詢輿情咸稱閘南宜開子河引普安清水新村

等問諸水同至平定哨入河則泥沙石子不能停住復行至海口駕船猶視見有舊埂一條沉埋橫塞其中埂外龍王廟前有牛石灘又側而下有牛石洲俱阻攔出水詢諸土人此一灘一洲自古所有原未易修應將此一灘一洲並前一埂盡行挖去則海口流通沿海田地自無淹沒之虞臣復博訪確查即分委昆明等四州縣照議督修所用人夫即令四州縣發給口糧並鹽菜等項於是各州縣人民皆踴躍從事於雍正七八兩年農隙時興工所有海口河道洱宗等間壅淤處所悉已疏濬老埂牛石灘牛石洲等處盡行挖出悉已寬深平定哨間南新開子河一道悉已修通復因普寧舊河水陡流急阻回新河之水並新建偏水壩一座新河悉以暢流歸入大河又於海口外之石龍壩兩岸山脚俱新築堤埂保障河基悉已堅固所需物

料併人夫口糧等項合計銀五千六百餘兩臣已設法辦理見今四州縣沿海沿河及近海口內外居民既免淹沒併涸出膏腴田畝甚廣至四境之內河道甚多條分派別各有源流查勘估報共銀一萬八百餘兩復委司道親勘確核無異應需銀兩已於查出各項田地變價銀內動用今及時辦料興工匠查海口陸河並各支河皆足以資灌溉而備蓄洩獨因淤塞日久開濬少難以致水不注海田僅通溝高地惟望雷鳴下區則憂雨積此稻糧疊歉之故實人民苦樂所關如果山澗以水水艮以山俾彼此相資互得其用或旱潦可為轉移荒瘠早施補救人力既盡天必垂憐此臣之所以由近及遠歷日積年務期通行成效勿敢怠忽勿敢遺忘者也惟是既興工作宜定章程庶可以經久而不致廢墜查雲南府原有水利同知昆明海並

陸河及各支河巡查濬修是其職分應請鑄給關防重其  
考成昆陽川為昆明下游海口在焉距省百里同知難以  
兼顧請於昆陽州添設水利州同一員駐劄海口常川巡  
察亦請鑄給關防以專責成通省各府州縣皆有水利原  
無專員議却因循託辭藉口若將同知通判州同州判經  
歷吏目縣丞典史等官加以水利職銜凡境內河道溝渠  
責令專理除雲南一府仍歸糧道管轄其餘各屬在遼東  
者統歸遼東道管轄在遼西者統歸遼西道管轄仍令各  
該府查勘驗報各該道考察詳明聽督撫二臣核酌勸懲  
則不一二年將通省水利有興無廢而克濟民生殊匪淺  
鮮矣抑臣更有請者昆明之陸河昆陽之海口及臨安之  
三河所關尤鉅歲修銀兩不可不酌定查各項正款固不  
應擅挪即各項盈餘亦未便濫費惟鹽道衙門歲有合稱

銀一千五六百兩不等並不在正項盈餘額外盈餘及各  
項積餘之內而鹽道張無咎絲毫不隱請即以此項撥作  
歲修之用撥餘銀兩統數積存以備大修之需似於水利  
民生更有裨益矣

請補東省兵額疏 雍正九年

岳濬

巡撫山東等處地方提督軍務兼理糧餉都察院右副都  
御史臣岳濬謹 奏為東省車兵懸額未補謹陳末議仰  
懇 聖鑒事竊東省撫鎮各營於雍正七年五月內奉

旨挑選車騎營兵二十名派往北路出師欽遵派往  
在案伏查東省左控海疆右臨漕運路通九省水陸交衝  
登宛兩鎮並無標馬步兵共一萬六千六百八十二名除  
各員親丁名糧之外實在馬步兵共一萬五千二百六十  
四名緣地方遼闊汛務殷繁各路散防僅供差撥派往北

路車兵二千名又經按營抽撥十分之內挑去一分有餘  
是以汎廣兵單不敷差遣因查出征車兵各本名歲支糧  
餉荷蒙 聖恩准其按季支領俾養贍家屬無憂內願

臣仰體

皇仁豈敢輕議募補而行伍關係甚重又亟

需補足原額臣再四籌畫莫若將該兵子弟諭令各家報  
明該管鎮將擇其壯幹者暫令頂補充伍俟大兵凱旋之  
後本兵回營仍將前項暫充之子弟俟有開除名糧即准  
拔補以示鼓勵既不繁另給錢糧又可以共資防護實為  
一舉兩得倘該兵並無親子弟姪無可頂補可否念行伍  
為重另募鄉農添補足額仍懇 恩准另給步糧暫資

口食俟本兵歸伍停其支給即將新募之人與暫充之該  
兵子弟一體候糧拔補雖增給糧餉所費稍多而兵額無  
懸實於營伍地方大有裨益再查兩鎮兵丁俱係督臣營



轄且直隸河南山西各有車兵均未酌補非臣一隅之見  
所敢臆論但臣身居東省目覩情形不敢不據實密陳上  
瀆 宸聽倘臣言可採仰祈 皇上特頒諭旨將東  
省原撥車兵分別充補以實營伍併懇免將臣摺發部不  
使臣顯蹈越俎之愆益戴 聖恩於無既矣

皇清奏議卷二十九

皇清奏議卷三十

景敘全滇水利情形疏

雍正十年

鄂爾泰

少保兵部尚書兼都察院右副都御史總督雲南貴州廣西三省等處地方軍務兼理糧餉世襲三等阿思哈尼哈番加十二級紀錄二次臣鄂爾泰謹奏為全滇水利已未興修景敘陳明仰祈

睿鑒事竊雲南府屬嵩明州

之陽林海又名嘉麗澤納龍巨南冲二河之水並受四面山河各水會聚成淀出河口入車翁江達金江因河灣迂曲去水甚緩停留沙石壅塞咽喉每將海邊四十八村已成田畝半行淹沒甚為民患詳加察訪海水深止二三尺若改疏河道由丁家屯龍喜村開挖二里許直通河口使新舊兩河並瀉水勢暢流不獨四十八村可永免水滂而周圍五十餘里草塘均可開墾成田隨委員會勘於是各

士民踴躍出夫資給口糧於雍正六年春報竣從此田畝  
歲收並涸出地田一萬餘畝再府屬宜良縣窪地多淹高  
地無水旱澇不均有需調劑復委員履勘所開河共五道  
一在城東北五里五百戶營之南開長約五里已通赤江  
一在城東三里龍王廟北舊多積水開長約四里亦瀉於  
赤江一在龍王廟南為北來羣水所會開瀉水河約十里  
水不為害一在城南二十里地名乾墩子緣地無水一望  
平行棄為廢土於赤江邊決一水門開河一道引肥水灌  
田見已獲濟惟自江頭村起所開引河一道地形漸高水  
勢難上殊無益灌既復議自胡家營北接舊河另開一道  
約長五六里甚有裨益見飭於農隙興工約明年春可竣  
又臨安府有瀘江一水來自石屏洲之異龍湖合塔衝象  
街二水及六河九湫皆會於瀘江以赴巖洞伏流十餘里

出達州入盤江而洞口洞底石埂十三重阻水不能直瀉  
每遇夏秋暴雨奔湍四潰田廬淹沒經委前任知府張無  
咎鑿石疏河自瀘江至巖洞堤岸八百一十丈自塔衝二  
河至三河口堤岸四千三百七十五丈並造橋釘椿它漢  
諸件一併築修見已有利無害禾稻倍收再府屬之達水  
州查自南莊十六營以下墮都子口郭依村等八處田地  
甚多苦無活水但雨澤稍遲即秋成失望前仕知州祝宏  
以附近南莊之李浩寨山腹中有過泉一道細流不息入  
地無踪向下尋流約三十里流出於州屬之老鼠窰知為  
此泉無疑遂穿鑿地道伐木為鑊穴中水湧勢甚湍激隨  
復開溝導水儼成大渠並酌定規條令挨次引灌而該地  
田畝皆賴以豐收府屬之阿達州離城里許有小河一道  
歷來不通舟楫該署州漆扶助遵檄疏濬自水泉下達州

城由祿豐鄉直達盤江計三十里兌可行舟府屬之蒙  
自縣有縣壩一區圍繞城外平坦寬闊可成沃壤因灌溉  
無資遂棄為曠土查得城南學海塘壩上流亦經淤塞若  
濬深數尺連開築堤開溝引水即可以肥田該知縣王廷  
諍興修報竣天曲靖府屬之尋甸州城南平川沃壤皆可  
墾土成田緣尋川一河會尋甸嵩明兩州之水每夏秋積  
雨一望汪洋加以馬龍州河水又會於七星橋下冲激尋  
川之水逆流氾濫即附近熟田亦歲被淹沒熟籌博訪就  
其山形水勢及遠近高低欲使尋川河順流直瀉必先使  
馬龍河不爭水道必須另開子河俾尋甸嵩明之水皆得  
暢流並可免冲激不致氾濫經陞任知州崔乃鏞查勘興  
工於雍正八年春報竣約可涸出田地二萬餘畝但大河  
中流有整石四十餘丈務須開鑿而施力殊難復議另濬

沙河十五里以收全功見委迤東道屋維壘就近督修又  
激江府城南之撫仙湖延袤百餘里中流深處可百餘丈  
以受各山之水亦名為海由寧州入阿達注盤江會流以  
達粵境每雨多水泛宣洩不及則附郭之河陽並江川寧  
州三處利害共之惟海口一河尚堪疏洩明時曾建牛舌  
梅子箐二壩截兩山之冲激遏沙石之壅淤今石壩傾頽  
更無可恃據該知州王鐸詳請興工隨發銀委辦計石工  
一百七十六丈零首尾寬深堤壩堅固又增築遏水壩六  
墩以固石壩以滌岸沙河陽田新潤出三十餘畝舊田遍  
種見獲豐收又楚雄府屬之鎮南州舊有水塘築堤積水  
以資灌溉名千家壩因傾廢百年水無停蓄一遇亢旱浸  
插並難諭該知州金鑑確勘詳覆其水來自北山龍王廟  
及多岐廠等處兩傍坡巖壁立四季泉源不竭會流箐口

兩山迴環儼如門扇基址天成蓄水成塘可灌數十里田  
畝隨令築壩建閘工完報竣又東川府雖倚山臨川不通  
河道種稻田者無多餘半為荒土而城北漫海一區寬長  
二十餘里地本肥饒因積水難消棄置已久自割滇轄經  
發銀數十兩令前任知府黃士傑於雍正五年開河三道  
一從馬五寨至魚洞二十里為左河一從瓦泥寨至水城  
二十里為中河一從拖落村至魚洞二十里為右河建石  
閘二座木橋四座水消田出業招民承墾又從馬鞍山開  
河一道約長十里以濟漫海從梅子箐開河一道約長十  
里會合中河及知府崔乃鏞接任加修旋據報竣其餘如  
嵩明州之寬即河效古曰足二里田畝同資灌溉因分水  
不均里民爭控飭另開子河一道俾兩里均平宣威州舊  
少水田僅資喬參知州添扶助於雙龍山泉會合處建石

閘一座於戈山河口建石壩一座左右各開渠一道於嘉惠落水碕旁建石壩一座開渠一道截流引水均可墾田於雍正九年八月報竣祿勸州地僻土寒穀難成熟惟正東東南等村可以種稻內有馬家莊等處田高缺水舊有水溝一道久經壅塞前任知州賈秉臣請從山腰紆折鑿石成渠匯復溝水可灌田數千畝發價飭修不數月報竣大理府洱海之海口為附郭之太和及趙州鄧州三州縣水利所關因壅塞多年每遇雨水泛濫海田多傷據前任同知佟世陰詳明興修水得暢流田禾攸賴又雲南縣有團山一壩舊立閘三道引梁王水泉灌溉田畝歲久傾圮難資引灌因開修溝閘並濬青海尾赤河尾業經報竣浪穹縣因湖水汎濫疏濬時河等處築堤四十餘丈廂木樁五十架業經報竣但補苴一時尚非遠計見復委勘加



修永昌府城外有南北兩河田畝攸賴因壅塞已久歲損  
禾苗據該鎮府等倡率兵民用夫一萬餘於雍正四年報  
竣以上各件工有大小時有遲速或給發承修或騰挪濟  
事或奉行官吏加意急公或本地士民出夫協力並未動  
項皆已完工內有仍需加修者亦不過增補其各屬地方  
如堤壩圩堤溝洞渠塘等類隨時疏築此外如臨安之建  
水石屏俱受蘆子溝之患舊我之城垣田廬俱受練江蛟  
江之患曲靖之西樣湘南寧之落水洞羅平之西北一河  
新興之玉溪路南之蜡甸和曲之紅土田趙州之彌渡雲  
南縣之馬鞍鄧州之芷彌浪穹之寧湖皆應疏濬開鑿俾  
有利無害祿豐縣之宜重修廢橋定邊縣河之宜建石堤  
永北府之羊保山宜建石壩順寧府河之宜造鐵索橋皆  
應乘時料理庶力少工多至於通粵河道最關緊要非止

使客商實欲資糧運於雍正七年春即發銀飭修已由阿  
達州以下開至八達共一千五百里造船試行直至土黃  
有旱路二站亦經置辦車牛並蓋棚店下船至剏隘則經  
達粵江因委被劾原任廣南府知府賈秉臣並未徹底開  
通故雖勉強行舟河路尚屬危險見復委員確勘妥議增  
修又嵩明州之河口經尋甸東川由牛欄江達金沙江周  
環川江復抵昭通以通舟楫雖工程不易人力所能見委  
試用知縣以下趙世綸等備細估勘繪圖覆奪若得川粵  
江河舟通滇會則片帆可達吳楚又不止尋常水利事矣

敬陳慎刑二事疏 雍正十年

張廷玉

經筵講官少保保和殿大學士兼管吏部戶部尚書翰林  
院掌院學士事臣張廷玉謹 奏為分別監禁之例詳慎  
引律之條以免濫禁以成信讞事竊惟 國家之設監獄

原以收禁重罪之人是以各省人犯罪重者收監罪輕者  
或令人取保或交人看守本人亦自知所犯甚輕無潛逃  
私逸之事獨有刑部衙門遇八旗部院步軍統領衙門以  
及五城御史等交送人犯不論曾經奏聞與否亦不

論事情之大小與犯罪之首從一經鎖送刑部而該部即  
收入圜牆之中聽候質審以致獄卒之需索欺凌吏胥之  
恐嚇詐騙備極困頓百弊叢生甚至有傾家煨斃者及至  
定案時而新絃罕流重犯原無多人其餘不過徒杖答責  
之罪甚至有偶爾干連審係無辜應行釋放者如今年二  
月間刑部清查案件省釋者二百餘人即此類也臣細求  
其故國家定例原不如是祇因陋習相沿彼拘送之衙  
門初不計其到部之苦而刑部官員又以監嚴毋縱可告  
無過遂至常行而不改也似應特頒諭旨令九卿悉

心妄議凡衙門奏

聞交送刑部及自行拏送刑部之

人何等當收禁監獄何等當取保看守分別定例詳慎遵  
行如此則濫禁之弊可除而於刑名不無裨益再者律例  
之文各有本旨而刑部引用之時往往刪去前後文詞摘  
中間數語即以所斷之罪承之甚至有求其彷彿而比照  
定擬者此間避重就輕避輕就重司員之藉以營私吏書  
之高下其手皆由此而起臣思都察院大理寺與刑部同  
為法司衙門若刑部引例不確應令都察院大理寺駁查  
改正倘駁而不改即令題參如院寺扶同朦混或草率疎  
忽別經發覺則將都察院大理寺官員一併加以處分如  
此或亦清理刑名之一助也

請據備倉穀以利民生疏雍正十年

鄂彌達

巡撫廣東等處地方提督軍務兼理糧餉都察院右副都

御史臣鄂彌達謹 奏為敬請豫備倉穀以利民生事竊

照粵東濱海環山民稠土狹廣州省會及佛山龍江各市鎮商賈雲集本地所產穀石豐歲僅敷民食不能應省鎮商賈之需若遇稍歉則咸仰給於西省之穀而西省地廣人稀穀石有餘亦惟販運東省可以銷售此兩省互為資藉之勢第越疆行貨利在速售東省穀貴西販固可為利若遇價賤東省商民又以西穀不如東穀肥滿而西穀有難銷之患故東省穀賤則西客觀望不前東省又因西穀不來即驟長價而東省亦時有缺穀之憂臣仰體我

皇上子惠元元至意悉心籌畫惟買備平糶然後東西兩省均有利焉查廣州省城上流一百二十里三水縣屬有西南鎮乃西販聚集之所若於水次建造倉厰委員於價値平賤西穀壅積時收買數十萬石貯倉遇西販少至即

開倉發糶州縣百姓既有糶三之倉穀接濟青黃省鎮商賈又有此備糶之穀石供其缺乏則價值必不至驟昂西販知有官倉收穀可隨到隨賣自必販運恐後且收於平賤之時糶於長價之日雖比市價稍平除去耗折亦必獲有盈餘矣此收穀銀兩臣查雍正八年欽奉 上諭事

案內江西省撥助粵東各府州豫備銀十萬兩應請暫借五萬兩以爲收穀之資約分十年扣還庫項外所有盈餘一併買穀年年如是愈積愈多於國計民生實有裨益至買糶事務查廣州府糧捕通判事稍簡堪委專管仍聽糧驛道盤查統轄交代奏銷悉照常平倉一例遵行管倉之員即以三水縣西南驛驛丞就近兼理無庸添設應用斗級名數視厰座多寡酌定應需工食於裁官役食銀內動支俟糶出穀價盈餘銀內還項建倉工料委員確估統於

借支五萬兩銀內動用建造亦俟盈餘穀價分年扣抵所有收糶價值並實貯細數歲底造冊由糧驛道布政司核明轉繳撫臣覆核題報如此則東民無乏食之虞西穀無難銷之慮一轉移間於兩省民生均有利益矣

安插粵東窮民開墾疏 雍正十年

鄂彌達

巡撫廣東等處地方提督軍務兼理糧餉都察院右副都御史臣鄂彌達謹 奏為安插窮民開墾情形仰祈

睿鑒事竊惟粵東地方山海交錯民俗刁悍貧苦者多所以小民惟利是圖每於封禁之礦山潛往偷窰甚至販私盜竊毫無顧忌雖因習尚澆漓輕蹈法網亦由無田可耕無業可守遂致漸流為匪臣自抵粵以來將奉到歷次

諭旨刊刻遍示曉諭勸導一面嚴飭該地方文武官弁時加巡邏勿任礦徒聚夥偷窰旋據各屬覆稱小民間有

上諭欣喜觀聽咸知感激

天恩不敢輕犯原封

硃口無人偷窺臣隨行查各屬礦土及實在無業窮民已據各屬報到二千餘戶正在商酌安插荷蒙

聖主垂

念欽差禮科給事中徐杞偕臣悉心辦理隨經科臣徐杞親歷山場遍行查勘各處礦硃皆屬封固硃口蔓草叢生並無偷窺之事惟是無業窮民若不悉心調劑使其衣食有賴難保後來不蹈故轍查肇慶府大官田地方新設鶴山一縣及附近恩平開平等縣見有荒地數萬畝以之開墾耕種安插貧民最為相宜臣上年曾奏糧驛道陶正中料理新縣城工兼令查勘荒地鶴山縣境見據丈出荒地三萬三千餘畝查業戶耕地百畝須佃五人此可安集佃民一千六百餘戶恩平開平荒地甚多不止一二萬畝見今丈出五千餘畝尚未及四分之一因該處地廣人稀



雖有藩庫墾荒銀兩莫肯赴領承墾臣等諭令有力商民招集惠潮等處貧民給以廬舍口糧工本每安插五家編甲入籍即給地百畝復念各佃遠來托居雖有可耕之業仍恐日後予奪憑由業戶不能相安應為從長計議凡業戶領田百畝各佃俱帶領地五畝與田主一例納糧永為該佃世業田主不得過問庶佃戶稍有餘資無偏枯之嘆亦可無逋租之虞今惠潮二府貧民就居鶴山耕種入籍者已有三百餘戶見在陸續依棲日益增聚兼聞先到之人安頓得所無不踴躍趨赴其各屬未報貧民亦必陸續報出容臣遍查高雷廉等各府州縣可墾荒地一併丈出次第設法安插使窮民皆有恒產足以資生不數年間野無曠土地無遺利全粵深山窮谷無復有失業游手之民風俗淳美夜戶不閉實於國課民生兩有裨益行見地方

官民均感

浩蕩洪恩於無既矣

皇清奏議卷三十